

KOLOS

Takatimlakays mwasanin iyyaweids, ikatimlakes tayekelesiys ven Kolos waseg, ilansa, “Yeisuw Kelis anmwānet nag kadilok bikatinabweids adsinaps kalbaleb waseg.” Ilivans-vak, “Yeisuw Kelis natawtoun kalamwey, nag tatawtoun tatonen.”

Pawl iligen siyaweid, mapuna ilel min-Kolos silet towen, ilana, “Kelis Yowbad natun, anmwānet tatawtoun mtowen, bweina kadilok youd babaw.”

Nakabsilamaw

1 ¹⁻² Yey Pawl, peinan Yowbad nisekeig gunawotet, akokew livānen Yeisuw Kelis banow ven mwasanin wasigeis. Soug Timotiy milet towen nakalel biwekeimiy min-Kolos yakamiy tayekelesiys, o tatoukums yakamiy waseg Kelis. Tamads Yowbad bisiwyoubumiy vāgan mo beitaw nuwamiy.

Pawl ikalin nuwan pines tasiyas

³⁻⁶ Yakamey wamapalatan nakases, tut babaw kannitoug pinamiy yakamiy, ikalin nuwem peinan nakaligen nukutoukums bwein waseg Yeisuw Kelis, o nukusiwayoubs bwein wasigeis tasiyas tayekelesiys. E, kuyousis sinap towen, peinan kuninuwes minamis igaw mimwasaw walbalab mo bukulivatus. Mapuna yakamey kanitoug pinamiy, waseg Yowbad, mtowen daGuyaws Yeisuw Kelis Taman.

Libalab bulagan kweiboug nukuliganes, livan to moundid, bwanabwein. Vena babaw iliganes livan towen, anagin ivag wasigeis, ikatimweis mo ivakaein; o yakamiy-vak māwan. Wanmugwana nukuliganes livan towen, mo kukwakins Yowbad nasiwayoub moundid.

⁷ Kweiboug Epapil nikatimlakeimiy sinap towen, simey towen mawotet katanok-wan. Mtowen gamag bwanabwein, itakum Kelis nawotet peinads yakids.

⁸ Towen Epapil idibakem, ilana, “Yowbad Kululuwan ansinap siwayoub ikatipel wasigeis tasiyas min-Kolos.”

Kelis nawotet

⁹⁻¹⁰ E, nakaligen livneimiy towen, mapuna tut babaw kakkulul wamatan Yowbad, kannitoug pinamiy yakamiy vāgan Yowbad nanon

silmanin yakamiy bukukwakins beikous, o Kululuwan bikatipel sinap towen bisekeimiy; o vagan amisinap waseg mo bitimek daGuyaws, o bikalin nuwan wasigeis yakamiy, peinan bukutoukums silmanin miwotet babaw bwanabwein, o bukuyakousis sinapun Yowbad.

¹¹⁻¹² Kannotoug pinamiy yakamiy vagan Yowbad bikimtuw mitawtoun waseg natawtoun tonen singay avakaein, vagan kid youd babaw waseg abamiy bigeg mo bukwaptuleimiy o bukuvvaluts miwotet bwein sona mimwasaw. Bikalin nuwamiy Tamads waseg, peinan bo itam inakaleiwag kamnat, waseg nitasesus sidayas inagamag.

¹³ Bo ikatinabweids dadub kaleiwag-nen waseg, mo isekeids dakabsis wanuwan nakaleiwag Natun bwanabwein.

¹⁴ Mtowen Yeisuw niyamiyiseids, vagan bilikuds adsinaps kalbaleb waseg.

¹⁵ Nag teitan gamag bikin magin Yowbad, tage ankakin Yeisuw maḡwana Taman. Yowbad nabubun meivek-wan daban Yeisuw.

¹⁶ Yeisuw gog ileb Yowbad mo nibun youda babaw, walḡalab watinow; youd mwasanin takines, mwasanin nag. O Yeisuw waseg mo ibun kaleiwag babaw, mwasanin kaleiwag-nen libḡalab, mwasanin kaleiwag-nen ven watinow. Bo ileb Taman mo ibun youd babaw silmanin Yeisuw.

¹⁷ Yeisuw imug; youd babaw wankuyeim; o Yeisuw natawtoun waseg youd babaw nisesus sikabsis waseg.

¹⁸ Mtowen daban, woun waseg, mamagina tayekelesiys tanuwagan towen. Mtowen tamgwayein-kit, iginikit kanig waseg; mapuna youd babaw waseg tamgwayein mtowen.

¹⁹⁻²⁰ Peinan Yowbad itam nakamnat meivek-wan isesuna Natun waseg, o Natun waseg mo ivag ked towen silmanin youd babaw o gamag babaw bitalatanes sods Yowbad, takinew yakids ven watinow o takinew tasiyas min-libḡalab. Buyavin iwtawout waklos mo ivag ked towen.

²¹ O peinan kweiboug yakamiy mamagina takammeiliws yakamiy nukusinales Yowbad, amisinap kalbaleb.

²² Nagein gog nukulatanes simiy Yowbad, peinan neiweiys Natun, won ikanig; tage bo itokeimiy imayeimiy wamatan Yowbad, amisinap kalbaleb bo ikous. Sivanan bivag amisinap beibwein, kamnat.

²³ Kadiloka bukutoukums mitawtoun waseg, vagan bukusesus bwein wamatan Yowbad. Awoum bukupiyaves livan towen bwanabwein nukuliganes; kadiloka bukunmises. Livan towen kallivan vena babaw wadaban pwepway. Yey Pawl gunawotet towen.

Pawl nawotet wasigeis tayekelesiys

²⁴ Nagein gog abag igeg pinamiy yakamiy; nag igeg nanoug, nag. Ikalin nuwag peinan woug waseg alivet moumouvit, vagan Kelis won baleb. Kweiboug moumouvit nilivet Kelis, silmanin won; o won Kelis mamagina

tayekelesiys yakids. Yey-vak mawan, alivet moumouvit pinamiy; mamagina akatimweis Kelis namouvit vagan kid mo bikadilok.

²⁵Peinan Yowbad bo isekeig gunawotet vagan bakatimlakay wasigeis yakamiy mo bukukwakins anilivan vagan bukuyakousis.

²⁶⁻²⁷Livan towen kweiboug nikawum-wan. Tammwayas pwamug nag ikakins; tage nagein Yowbad mo ikamtel angamag wasigeis, peinan sivinan tobwag ven gimgilis yakamiy o min-Yudiy yakamey, babaw yakids bitakakins sinkawum sinap singay tawtoun. Sinap towen mamagina Kelis bo isap wasigeis yakamiy, mapuna bitanmises igaw abads mo beibwein Yowbad naven waseg.

²⁸Livanen Kelis kageiguy gamag babaw wasigeis; sinap babaw kakatimlakes gamags vagan mo biyakousis Kelis ansinap bwanabwein.

²⁹Bo iseiw nuwag silmanin wotet towen, atawtoun, peinan Kelis waseg yey itawtoun, iwotet wananoug.

2 ¹Sivinag bukukwakins gunawotet tawtoun pinamiy yakamiy, simiyas min-Leyodisiy sisiyas tasiyas na-ikakins magig yey ven watinow waseg.

²⁻³Sivinag bikimtuw kululuwamiy, vagan bukusiwyoubus simsimiyas, o bukukwakins beibwein sinap babaw, son sinap nikawum-wan. Sinap towen livanen Kelis, peinan sinap tawtoun meivek-wan nises Kelis waseg.

⁴Adibakeimiy livan towen bo bakatiboug nuwamiy; awoum ge gamag mwasanin bikatidavimiy; awoum asilivan kamnag bukuliganes o binek ninoumiy; awoum.

⁵Kadiveiyov ases, tage nuwaneimiy waseg yey nises. Amwasaw peinan akakin kusesusa bwein, o peinan kutams bwein Kelis nakaleiwag waseg.

Tasesus bwein Kelis waseg

⁶⁻⁷Peinan nukutams waseg daGuyaws Yeisuw Kelis, kadiloka simiy Kelis bukounounas. Nukusilamaws Kelis waseg, o towen Kelis bikatimweisimiy mo bukutawtouns. Kadiloka bukusimounids bwein livanen Kelis to nukuliganes mo bikalin nuwamiy singay.

⁸⁻⁹Kumtaktivateimiy. Awoum teitan gamag bikatidavimiy nakatimlakay kweitan waseg. Gamag mwasanin sikatimlakay yaweid-wan mawana tammwayas asisinap. Sinap towen meinoy neim siGeileiw waseg, Kelis nag. Tage Kelis won waseg sinapun Yowbad meivek-wan nises.

¹⁰Kelis waseg singay sinap bwanabwein bo talivatus, peinan anelos o bwagaw situwaweaks wasigeis bo itakayway.

¹¹Kelis waseg nibwabwes momwamiy; nakabivatus nag ivag wakalivimiy, nag. Tage nakabivatus waninoumiy, mamagina ibob woun nakaleiwag wasigeis yakamiy.

¹²Nakabaptayseimiy mamagina nukukwanigs simiy Kelis, nukubus alawagamiy, mo nukukits vayuwein simiy Kelis, peinan kusimounids waseg Yowbad, peinan nitawtoun mo iyakit Kelis vayuwein.

13-15 O yakamiy, kweiboug mamagina takanigs yakamiy, peinan amisinap kalbaleb, o Kelis nag ivag nakabivatus wasigeis yakamiy; Yowbad mo iyamoveids sods Kelis, inumlev adsinaps kalbaleb; o livan waseg niyateleids peinan nitasiplaves Yowbad nakaleiwag, mo iwid livan townen, isew tanaban, ikatikavates Kelis anklos waseg. Yowbad bo itakayway wasigeis tasiyas Seitan siney bwagaw sikaleiwag, mo imwan won, imwasaw; tasiyas gog wamnat ivag asimwasin. Peinan Kelis anklos waseg itawtoun wasigeis tasiyas.

16 Awoum teitan gamag bivtokeimiy livan, peinan kaeimiy o amisoup, o aw-sagal bukupiyevev, takinew tibukon kweivaw o takinew Sabat kweitan; awoum.

17 Min-Yudiy makaleiwag townen mamagina kululuwan mav. Kweiboug nitakines kaleiwag makava kululuwan; nagein gog kaleiwag tonen anagin bo isap, mtowen Mesay Kelis.

18-19 Awoum teitan gamag bipiyaveimiy peinan nag kukululs avakaein wamtes min-libalab mwasanin. Townen adok bilivan, bilana, “Matag isisawl mav, amikon waseg mo asinap mawan.” Tage nanon waseg ikayapam mav sinapun ven watinow, tage nag iyous daban tonen, yagan Kelis. Woun antuvas meivek-wan ikatives imlavag woun katanok, tage daban bikaleiwag mo bikidumwal won babaw; bivakoum mo bikatimweis won, bivakaein, bitawtoun, Yowbad natawtoun waseg.

Mwamovads kweivaw Kelis waseg

20-22 Peinan bo takanigs sods Kelis, Geileiw sikaleiwag mo beikous wasigeis yakids. Aveiyag wawun nukuvvaluts ven watinow kaleiwag-nen? Gamag mwasanin sikaleiwag kuliganes, ilansa, “Awoum kuyousis youd townen; bwaboum. Awoum kwamkwen kan townen; bwaboum. Awoum kwabkwen youd townen; bwaboum.” Youd tasiyas nagein bo takines, siwotet nises; tage kweitan tut bo bikanig kawkawan.

23 Gamag tasiyas askakin mamagina tassinaps, peinan ivkakes sitapwaloul tatineis, imlavags mamagina tasimavs wamtes min-libalab, ikatkakils, idokes bikaliwages wous tatineis; tage vikeiy bo ikaliwages tasiyas.

3 1 Kanig waseg nukukits simiy Kelis, kadiloka kuneves libalab sinapun, peinan Kelis nissin walbalab, Yowbad wanakatay.

2 Kuninuways libalab youdanen; youdanen ven watinow awoum.

3 Nitakanigs gog, mwamovads son Kelis nises, nikawum nises waseg Yowbad.

4 Igaw Kelis bisap vayuwein, mtowen mwamovads mounid, simiy Kelis mo bukusaps yakamiy, nakamnat avakaein waseg.

5 Kwatimates kid youdanen ven watinow, subwan, kalokay. Awoum amivikeiy bikalawageimiy silmanin sinap kalbaleb. Awoum

kumtimwamons waseg wuliyougwan ven watinow, mamagina miyowbad tobwag bukuvages wadaban pwepway; awoum.

⁶Peinan gamag mwasanin asisinap māwan, Yowbad mo bikawkunes bimapus.

⁷Kweiboug yakamiy amisinap māwan, mamagina ven watinow gimgilis yakamiy.

⁸Nagein kadiloka kupiyaves sinap tasiyas, kavikun, kameiliw, yagay, vtokay livan, kalokay.

⁹⁻¹⁰Awoum kwatidavis simiyas; peinan nukulisawes sinap kweiboug; sinap kweivaw bo kukwawes, peinan tut babaw Yowbad ikatimweis amisinap, sinapun tonen waseg, vāgan bukuyakousis sinapun Yowbad.

¹¹Nagein gog Kelis waseg yakids, katanoka bod yakids, takinew mina-Gilis o min-Yudiy, tasiyas ibwabwes momwes o tasiyas nag ibwabwes momwes, o tasiyas tablābols, o min-koyakoy, o tasiyas tawwotets o tasiyas situwāveks, meiveka yakids katanoka bod, Kelis waseg, peinan daGuyaws towen anmwānet wanuwads nises.

¹²Peinan Yowbad nikatigikeimiy, nikayuseimiy, o ikalin nuwan wasigeis yakamiy, kadiloka bukuyousis sinap bwein, binok nuwamiy simiyas wasigeis, bukusiwayoubs, awoum kwayapams sinap waseg, bweina bukuvnases simiyas, o kukwaptuleimiy.

¹³Kal yak, kukin soum biyagageim, awoum bikapasal nuwam; bweina bukunumlev ansinap kalbaleb; peinan bo māwan adsinaps kalbaleb daGuyaws binumlev.

¹⁴Amsinap babaw son siwayoub; siwayoub bikatimweis sinap babaw mo bilaten.

¹⁵Yowbad nikatigikeimiy vāgan Kelis lubuluban waseg mo niwal bukulivatus. Inabod yakids nikatigikeids silmanin niwal towen. Bweina bitasiws lubuluban waseg, mo bikalin nuwads.

¹⁶Tut babaw, livānen Kelis bises waninoumiy, vāgan bukusinaps beibwein. Sinap babaw kwatimlakes simiyas, vāgan bidumwal asisinap. Bikalin nuwamiy Yowbad mo bukwanweles sam o wous tapwāloul, o kweivaw wous-vak bukuwutus, peinan Kululuwan bikatimlakeimiy.

¹⁷Aveiyag bukulivānes o aveiyag bukuwwteles, youd katanok katanok kuvvages daGuyaws Yeisuw yagan waseg, mo bikalin nuwamiy Tamads Yowbad waseg.

Sinap bwanabwein

¹⁸Vinay yakamiy kukwanawes mimwānas ages. Sinap towen singaya bo ibunek daGuyaws waseg.

¹⁹Tawaw yakamiy kusiwyoubus mikwawas; awoum kukwānes.

²⁰Gamagal yakamiy, kadiloka bukwanawes timmiyas o inmiyas ages, youd katanok katanok waseg. DaGuyaws sivinan amisinap māwan.

²¹Tawaw awoum kuyamamanis nitimiyas, mamagina bo bikawegweis wous.

²²Tawwotet yakamiy kadiloka bukwanawes ages mituwaveks nisesus ven watinow, sikaleiwag katanok katanok waseg. Kadiloka bukugoulus daGuyaws, mo bukutoukums silmanin mituwaveks siwotet. Kukin gog nag, adok bukuwotets wamatan mitovek, tage kukin binoun mo bibgumat woumiy.

²³Bweina biseiw nuwamiy silmanin miwotet, aveiyag bukuwteles; kwanawes ages mituwaveks, mamagina aygan daGuyaws bukwanawes.

²⁴Peinan yakamiy daGuyaws natawwotet yakamiy, kuninuwes maysamiy igaw wankuyeim mo bisekeimiy vagan bukusesus bwein bukusiagagas.

²⁵Yowbad igaw mo bimop takalbalebs asisinp; nakaleiwag teitan teitan wasigeis katanoka binuwek.

4 ¹Guyawaw yakamiy, kadiloka kumtakavates mitawwotet beibwein, tatanok tatanok wasigeis, mikaleiwag didumwal bukuvages peinan yakamiy mitovek walbalab nises.

²Tatanok tatanok yakamiy kadiloka bukutoukums nitoug, tuta babaw bukunitougs Yowbad waseg. Nanoum katanok waseg bukunitoug, bikalin nuwam waseg Yowbad.

³Kunitougs-vak pinem yakamey vagan Yowbad bikaliyow maked silmanin anilivan bwanabwein bakageiguy waseg. Livanen Kelis kweiboug gamag na-ikakins, nagein gog mo ikamnat, ageiguy; mapuna niyousigs nisenags wadeil.

⁴Kunitougs Yowbad waseg bilabeig vagan bageiguy livanen Kelis kamnat waseg. Kadiloka bageiguy mawan.

⁵Kadiloka kuvages amisinp beibwein simiyas tasiyas watoulan nisesus. Awoum kuymades mitut.

⁶Amilivan tut babaw son siwayoub, sabal; bukwatimapus bwein teitan teitan asilivan.

Nakabiyokous

⁷Bwadads bwanabwein Tukik singay tatoukum daGuyaws nawotet waseg. Igaw beiw mo bikamtel livaneig meivek-wan.

⁸Silmanin townen nakayeb niwekeimiy, bilivan wasigeis yakamiy, bukuliganes mo bukukwakins amawan makasis yakamey. Silmanin-vak biguyeimiy bikimtuw atemiy.

⁹Tukik son Onesim-vak biweis. Teitan miven gimgeilin mtowen Onesim, mamagina bwadag bwanabwein, tatoukum. Asteiy son Tukik bisekeimiy livnem wamapalatan townen.

¹⁰Alistak yey soug nakases wadeil, anilivan siwayoub wasigeis yakamiy; mawan-vak Banab nubein, yagan Mak, anilivan siwayoub

wasigeis yakamiy. Kweiboug nadibakeimiy, kukin mtowen beiw kadiloka kutams bises amibwabwal towen.

¹¹Yeisuw-vak anilivan siwayoub wasigeis yakamiy, mtowen idokes yagan kweitan Yusitos, gum-Yudiy teitan. Min-Yudiy tasiyas asteitoun sigwey nakawotet Yowbad nakaleiwag silmanin. Min-Yudiy yakamey misinaka amateivas. Singay gog ililabeigs tasiyas.

¹²Tayuwein miven gimgeilin simey nakases, yagan Epapil, anilivan siwayoub wasigeis yakamiy. Mtowen Kelis natouwat; singay ininitoug pinamiy yakamiy, vagan bukutamatuws son amisinap bwanabwein, o bukuyakousis Yowbad nanon silmanin yakamiy.

¹³Akakin-wan mtowen Epapil inawotet singay avakaein pinamiy yakamiy, o pines tasiyas min-Leyodisiy, o pines tasiyas min-Ayelapol.

¹⁴Luk son Dimas asilivan siwayoub wasigeis yakamiy. Mtowen Luk madoket bwanabwein.

¹⁵Agulivan siwayoub kusekes tasiyas tayekelesiys ven Leyodisiy; manwan-vak manawan Nimip siney tayekelesiys wanbunatum nisesus.

¹⁶Kuvinis millet towen beikous, mo kusekes tasiyas tayekelesiys ven Leyodisiy. Tasiyas-vak mo bivinis tapwaloul waseg; o yakamiy-vak kuvinis silet nalel nein silmanin tasiyas.

¹⁷Kudibakes Alikip, kulansa, “DaGuyaws nawotet nisekeim, kadiloka bukutoukum waseg, kuyakous.”

¹⁸Namag mulin towen yagag Pawl. Kuninuweigs yey wadeil nases. Yowbad bisiwyoubumiy.